

Bòternan Usá

Suponé ku un dia bo ta hasi kompra. Djèm ta riba bo lista. Bo a kohe un bòter di djèm stòbèri, paga p'è, bai kas, pon'é den kashi i lubid'é te algun dia despues. Ma ora bo ta habrié, bo ta keda sorprendí ku e tapa ta kita asina fásil. Anto bo ta ripará ku un hende ya kaba a usa bastante djèm for di e bòter. Bo ta kòrda bèk ora bo a kumpr'é; el a parse méskos ku tur otro bòter di djèm riba rèki den pakus. Kon bo ta reakshoná? Bo ta malkontentu. Bo a paga pa un bòter nobo, ma a haña un bòter usá. Aworaki mes bo ta kla pa bai pakus pa debolbé e bòter i reklamá bo sèn!

Ta interesante ku nos no ta despuesto tuma algu asina...pa ku un produkto ku ta kosta solamente fl. 3,95. Ma ora ta regardá algu muchu mas presioso, nos ta hañ'é mashá normal. Di bèrdat, esnan ku ta bringa pa nos por haña “produktonan no-usá” ta konsiderá antikuá, fèrfelu, impusíbel.

Kiko mi ke men?

Nos Kreador Su plan ta pa parehanan “habri un bòter nunca-usá” anochi ku nan ta kasa. Ma na nos konsepto, nos sa mihó ku Dios. Awendia e mentalidat ta ku mester habri e “bòternan di djèm” promé ku ta bende nan pa wak ku nan ta smak bon. Komo resultado, regularmente e kliente ta kumpra un bòter ku e ta kere ta nobo, ma ta haña un bòter usá, asta dañá!

“Bòternan usá” por ta kostoso i asta peligroso!

Poko yònkuman ta para ketu pensa tokante e konsekuensia serio ku por tin pasobra djis un biaha so ku e ta “habri e tapa, purba e djèm”. Komo resultado di e ún solo enkuentro seksual, e mucha muhé ta sali na estado. Algun tempu despues, e mener ta topa un otro mucha muhé, i nan ta kasa. Suponé ku e mener su salario ta fl. 1800,00 pa luna. E pareha por biba di e salario ei. Ma e yònkuman tin ku duna mama di su yu fl. 200,00 pa luna. Yùfrou, bo ke kasa ku un persona ku tin ku duna fl. 200,00 kada luna pa kuido di yu di un otro persona? Esei ke men ku boso komo pareha tin fl. 2400,00 ménos pa usa kada aña. Fl. 2400,00 por kumpra hopi kos! I ora e yu ta krese, e gastunan ta oumentá!

Poko hende ta konsiente kuantu angustia, doló i sufrimentu nan ta “kumpra” pa nan mes dor di “un bòter di djèm usá”. Enfermedatnan venérikos ta tur kaminda. Segun sífranan, na aña 1967, 1 di kada 32 tineidjer tabatin un MTS (malesa transmití seksualmente). Pa aña 1981, 1 di kada 18 hóben tabata infektá. Awendia, mas ku 1 di kada 3 hóben tin un enfermedat venérikos. Na Merka, 12.000 hóben ta infektá ku un MTS kada DIA! **Klaramente, e chèns ta hopi grandi ku si bo ta hòrta shòrt ún biaha so bo por yora lat ta malai pa e restu di bo bida.**

E MTS mas komún na nos islanan ta Klamidia. Hopi hende no sa mes ku nan ta kontagiá e enfermedat aki. Nan ta sigui gosa “de verboden vruchten” bai gol. Ku solamente ún infekshon di Klamidia, un mucha muhé tin 25% ménos chèns di sali na estado. E segunda infekshon ta hasi sterilidat 50% mas probabel. Di tres infekshon, kasi sigur e no por haña yu mas. **Ora e yùfrou KE haña yu, e no por...pasobra el a “habri e bòter” promé ku tempu.**

Nos Kreador ta prohibí tur relashon seksual fuera di matrimonio pasobra E ke nos bon. “*Laga matrimonio wòrdu onrá pa tur hende, i laga e kama matrimonial ta sin mancha; pasobra Dios lo huzga fornikadónan i adúlteronan*” (Hebreonan 13:4). Bo ta perhudiká bo mes ora bo ta ignorá Dios Su mandamentu. **E por kostábo bo sèn, bo amistad, bo felisidat, bo salú, asta bo bida.**

Birginidat i puresa moral ta algu sumamente presioso. Nos Kreador a regalá esei na kada un di nos. Apresi'é! **Ta ún biaha so bo por “habri e bòter, purba e djèm” pa promé biaha.** Ki un regalo presioso ora bo por regalá bo kasá anochi di kasamentu un bòter será, nunca-usá.